

Maestro di Aña, Enseñansa Primario, Murielle Brown-Roos:

Mi ta dedica e premio Appel di Oro na mi mama y tata cu te ainda ta apoya mi den mi trabao



ORANJESTAD- Durante un anochi espectacular Appel di Oro pueblo a cera conoci cu e nominadonan y ganadonan di e prestigioso premionan.

Maestro di Aña 2015, Enseñansa Primario, Murielle Brown-Roos, kende ta maestro di klas 6 na Mon Plaisir Basisschool, ta bisa despues di ricibi e premio, cu e ta sinti manera ta den un soño e ta; e ta sinti mescos cu su muchanan ora cu nan mester duna un spreekbeurt.

Murielle ta encanta cu su profesion y tur dia ta bay trabao cu entusiasmo y inspiracion. E ta splica cu e no ta lanta ni un dia y bay trabao sin placer; ora vakantie a caba, el a caba y hasta e ta sinti impaciente pa cuminsa bek despues di vakantie grandi. E ta sinti su mes feliz cu su escogencia di profesion y esey ta con e kier su alumnonan tambe sinti den futuro cu nan trabao, no importante kico e ta ni tampoco na ki nivel.

E docente ta di opinion cu e bon contacto cu su alumnonan ta hopi importante y e ta hinca su mes den nan sapato.

E ta splica cu ainda e ta kere den algun cos “ouderwets” manera cuminsa e dia cu un gesto simpel manera wak e alumno den su cara, duna un man y desea un bon dia. E ta agrega cu e momento asina cortico di contacto mainta caba ta duna e docente cu ta siña conoce su muchanan bon ya caba un impresion den ki estado emocional e mucha ta.

Sin bisa ni un palabra, pero e simpel contacto di algun seconde cu e mucha, e docente por wak cu e mucha ta bin cu “algo for di cas” y no por bay ta e alumno cu e por ta tur dia.

Juffrouw Murielle ta conoci como un promotor pa lesamento. E ta expresa cu ta hopi importante pa siña muchanan e placer di lesamento, como cu lesamento ta trece cun’e un poder di paden y ta engrandece e mente.

E ta duna como ehempel cu no tur hende por biaha, pasobra biahamento ta algo costoso. Pero, pa medio di buki y storia, e persona por biaha, e por dreña den bida di un otro ser humano y siña di e experiencia di e persona-

henan den su buki. Lesamento tambe ta yuda e mucha crece como persona, segun Juffrouw Murielle.

E docente ta subraya e proceso di descubrimiento di loke e persona ta gusta of kier; y e libertad y independencia cu lesamento ta ofrece.

El a bisa cu e ta ilustra e importancia di lesamento cu e su alumnonan pa medio di haci mencion di cinco bolo. Si tin mucha cu no sa kico por ehempel un “tompouce” ta, e ta splica e ora cu pa via cu e mucha no tin e conocimiento e kisas ta bay falta di purba algo cu por bira su bolo favorito. Lesamento ta algo cu mester purba, pero tambe e conocimiento cu e mucha haya ta yuda e mucha identifica un tompouce como un bolo dushi.

E docente ta subraya e proceso di descubrimiento di loke e persona ta gusta of kier; y e libertad y independencia cu lesamento ta ofrece.

Juffrouw Murielle ta finalisa bisando cu e ta bay inspira trabao, pasobra den su profesion e tin su felicidad. Esey tambe ta loke e kier pa su muchanan sinti. □